

26 APR 2001

DUTA BARU MALAYSIA KE PERANCIS SERAH WATIKAH PELANTIKAN

KUALA LUMPUR, 26 April (Bernama) -- Duta baru Malaysia ke Perancis Tunku Datuk Nazihah Tunku Mohd Rus telah menyerahkan surat watikah sebagai Duta Besar yang baru kepada Presiden Jacques Chirac pada 23 April lalu.

Beliau menyerahkan watikah pelantikannya sebagai Duta Besar dan surat panggil kembali bekas duta, Datin Paduka Dr Rajmah Hussain di kediaman rasmi Presiden Perancis, Elysee Palace.

Nazihah kemudiannya telah diperkenalkan oleh Chirac kepada Menteri Bertanggungjawab Atas Hal Ehwal Luar Mengenai Kerjasama dan Francophony, Charles Josselin dan pegawai tinggi Perancis, demikian menurut kenyataan yang dikeluarkan Kementerian Luar hari ini.

Kenyataan itu turut menyebut semasa pertemuan rasmi dengan Chirac, Nazihah menyampaikan ucapan selamat Yang di-Pertuan Agong Sultan Salahuddin Abdul Aziz Shah dan Perdana Menteri Datuk Seri Dr Mahathir Mohamad kepada Chirac, selain menekankan komitmen Malaysia untuk memperkukuh dan mengeratkan hubungan dengan Perancis.

Chirac semasa mengalu-alukan Nazihah telah mengutarakan hasratnya untuk mempertingkatkan lagi hubungan baik yang sedia terjalin antara Malaysia dan Perancis.

Chirac juga amat berminat melihat lebih banyak pertukaran kebudayaan dan kerjasama dalam bidang pendidikan dijalankan selain menyatakan kesediaanya menimbang memberikan biasiswa kepada pelajar Malaysia untuk belajar di Perancis.

-- BERNAMA

AT AHH RI